

Vom Oikaafe im neie Zentrum

Om Somsdaachmoie hawwe die Fraa unn ich im neie Oikaafszenrum, dene Flerschemer Kolonnade, die Paula getroffe. Die Fraa hott gefroocht: Iss doin Monn aach hier?

Naa, hott die Paula gesaat, der iss dehoom gebliwwe. Dess iss joo jetz schee ferr uns, de Karl brauch mich nimmi nooch Hochem odder nooch Risselsem ze fahrn um beim Aldi oizekaafe, den hawwe merr joo jetz vor de Hausdier. Ich brauch heit nitt vill unn dess bissi was ich brauch kann ich im Korb hoomtraache. Gonz defoo abgeseh, dass ich mir jetz mehr Zeit nemme kann als wenn de Karl debei wär, ihr Männer ... unn doodebei hott die Paula mich oogeguckt, ... ihr Männer habt joo koo Geduld unn wollt alls so schnell wie möchlich widder hoom.

Dess stimmt, hott die Fraa gesaat, wennde alloo bist konnsde emol e Schwätzje mache unn kooner iss doo der onn derr erumzoppelt. Unn wenn de Monn fahrn muss isses om beste, er bleibt im Audo unn dut die Zeitung lese.

Audo, hott die Paula gesaat, grad doodriwwer hawwe merr heit moie beim Friehtick geschwätzt, de Karl unn ich. Weil ich gesaat habb, dass in onnern Städtcher so enn Oikaafmarkt e bissi weit drauße, sozesaach uff die grie Wiss iss, unn dass mirs besser hawwe, weil unser grie Wiss mitte in de Stadt iss. Mitte in de Stadt, hott de Karl gesaat, die Kolonnade sinn doch nit mitte in de Stadt. Die sinn ferr uns unn all die onnern, die hinner de Bohlinie wohne, mitte in de Stadt. Awwer ferr die Leit, die im alde Flecke wohne, sinn die Kolonnade gonz weit drauße. Unn die kumme aach nit näher wenn emol die Unnerführung onn de Wickerer Strooß ferdisch iss, im Geechedeil. Wennde koo Audo host unn willst, saache merr emol von der Edderschemer Strooß odder vom Gänskippeel her oikaafe geh, dann iss dess enn Ausflug. Hie giehts joo noch, awwer hoom, wennde doin Korb odder doi Dutt voll host, dann zieht sichs.

Ja, hott die Fraa gesaat, doodriwwer hawwe merr aach schunn geschwätzt. Vor allem weils joo bald im Flecke nix mehr gibt wo de oikaafe konnst, wenn de Penny zu mächt. Unn wer waaß wasses mettem Norma gibt, ob der sich halle kann.

Ich saach: Ihr Mädcher, es gibt ferr alles e Lösung. Ich kennt merr vorstelle, dass ess dann so gewitzte junge Leit gibt, die ferr die Alde de Oikaaf erledische. Wenn dess richdisch organisiert iss, gibt die alt Fraa, saache merr mol jeden Mondaach um elf, dem junge Monn enn Zeddel, der kääft oi unn bringt die Sache dere Fraa, die gibt emm ess Geld unn, saache merr emol, drei Euro, unn dann hott jeder was defoo.

Honnes, hott die Paula gesaat, ich seh dess e bissi onnersder. Weil die alde Leit sinn so vorsichdisch, dass so enn Oikaaf lieber ihrne Enkel iwwerlosse unn ...

Die Fraa hott gelacht. Enkel! Ersdens kumme die nitt wennde se brauchst unn dann kimmt dess deirer. Koo Oma gibt ihm Enkel, wenn der mol was gemacht hott, nor drei Euro, mindestens fünf odder sogar zeh. Isses nitt so?

Ja, sächt die Paula, doo hosde aach widder Recht. Ess kennt joo aach soi, dass der Bürgerverein so was uff die Reih bringe dut. Odder ess kennt enn Bus fahrn, so enn kloone, unn der alle Stund, wo merr sich nooch de Fahrzeite richte kennt, aach widder nitt so deier, dass sichs die alde Leit aach leiste kenne.

Ihr Mädcher, habb ich gesaat, freue merr uns erst emol dass merr hier in de Näh oikaafe kenne unn wünsche merr dene Geschäfte hier, dene große und dene kloone, dass allmi-nonner Erfolg hawwe.

Eiern Honnes.